

## REGIONAL NEWS BULLETIN

### HEADLINES (EVENING)

Date – 07/06/2024

Time - 18:30 -18:40Hrs

- Sawrkar hna a nget lo contract a kum 15 chuang thawk tawh leh kum 20 chuang muster roll a thawk tawh te dah ngheh an ni dawn.
- AMC Ward 19-na Corporator tur thlanna tun thla ni 25-a neih tura chuh tum candidate 4 ten endikna an paltlang vek.
- May Ni 28-a Melthuma leimin in a hnawl zinga la hmuhloh pathumte chu Melthum YMA in a remchan dan angin an la zawng chhunzawm zel.
- BJP kaihruai NDA Parliamentary Party leader atan Narendra Modi-a, lungrua taka thlan tlin a ni a, Pu Modi-a hi Pathianni khian Prime Minister atan lak luh a ni ang.

<><><>

### CABINET MEETING

Sawrkar hna a nget lo contract a kum 15 chuang thawk tawh leh kum 20 chuang muster roll a thawk tawh te dah ngheh an ni dawn.

Nimina Chief Minister Pu Lalduhoma hoa Council of Minister thukhawm chuan thu ngaihtuah tur an chhawp chhuah zinga 18 te chu pawmin heng zingah hian Centrally Sponsored Schemes (CSS) hnuai hnthawk te chungchang leh Mizoram sawrkar hnuai contract leh provisional employee te dahngheh chungchang rel a ni a, aikal chungchanga sawrkarin dan a kenkawh tur rel niin Rifle Allowance cheng 40 ni thin chu cheng 80 a tihsan rawtna pawh pawm a ni.

Hei Bakah hian Sawrkar hnathawkin Aikal la te chungchang Assembly a an lo sawiho leh thuchhuak awm tawh te khawng taka kalpui tura pawm a ni.

Thutkhawmah hian Mizoram Ceiling on Government Guarantees (Amendment) Bill, 2024, Draft Mizoram Electric Vehicle Policy, 2024 leh ruangphurh chungchanga sawrkar kenkawh tur chin rel a ni a, Scheduled Tribes & Other Traditional Forest Dwellers (Recognition of Forest Rights) Act, 2006 bakah Mizoram consumer te hamthatna tur chungchang pawm a ni bawk.

<><><>

## TUALPUI

Tualpui khawtlang chuan an khaw chhuak Chief Minister Pu Lalduhoma lawmna leh chawimawina hun vawiin khan an hmang a,

Chief Minister Pu Lalduhoma hian he hunah hian lehkhabu pahnih Pu C. Laizawna ziah ‘Nunhlui Ngaihawm’ tih leh Pu C. Sangthuama ziah ‘Tualpui Chanchin’ te a tlangzarh a. Adviser to CM, Champhai North bialtu Pu H. Ginzalala chuan Chief Minister lim a hawng a ni.

Tualpui Mual Zawla Vantlang inkhawmah hian Chief Minister Pu Lalduhoma chuan Mizorama la thleng ngai zen zen lo - a lim din a ni chu zahthlak a tiin, phu lo a intih thu a sawi a, kalkhawmte chu Tualpui khua tihmingchhetu ni lo tur leh Tualpui khaw hmingthatna - buh ngah, hlo thlawh chak leh taima khua an nihna chhawm nung zel zawk turin a chah a. Mimal, chhungkua leh khawtlang runtu ruihhlo laka fihlim theuh turin a ngen bawk.

Chief Minister Pu Lalduhoma hian School Education Minister Pu Vanlalhlana thilpek - ‘Smart Board’ chu Tualpui High School hnenah a hlan a; Tualpui Primary leh Middle School Building te chu sak that an nih tur thu sawiin, zirtirtu indaihlohna pawh phuhruk thuai an tum tih a sawi. Hei bakah hian CM hian Health Minister Pi Lalrinpuii aiawhin Tualpui Health & Wellness Center hnenah damdawi engemawzat a pe a. Tualpui khaw power lakluhna 11Kv line thar siam nan P&E Department hnuai cheng nuai 113.94 an ruahman thu pawh a tarlang bawk.

Chief Minister Pu Lalduhoma hi a nupui Pi Liansailovi leh a chhungten an tawiawm a. Minister leh MLA bakah official thahnem takin an tawiawm bawk a ni.

<><><>

## AMC ELECTION CANDIDATES

Aizawl Municipal Corporation (AMC) Ward 19-na Corporator tur thlanna tun thla ni 25-a neih tura chuh tum te nomination paper vawiin khan endik an ni a, candidate 4 ten endikna an paltlang vek.

AMC Ward 19-na by election hi kil li atangin rorel lai ZPM leh eptu party MNF, Congress leh BJP ten an chuh dawn a, BJP candidate turin Pi K. Vanlalruati an ruat a, MPCC candidate atan Effie Vanlalhmangaihi ruat a ni a, MNF party Nomination Committee chuan Dr. Lalrinzuali Hrahse, Aizawl Kulikawn veng an ruat a, ZPM chuan AMC Ward 19-na inthlan chuh tur hian an party candidate atan Dr. C. Malsawmtluangi, Hlimen veng an ruat bawk a ni.

Aizawl Municipal Corporation Ward 19-ah hian Tlangnuam, Tlangnuam Vengthar, Kulikawn, Saikhamakawn, Melthum leh Hlimen te an awm a ni.

<><><>

## **WATER SCARCITY**

Tunhnaia ruahsur nasa avanga Tlawng lui lianin PHE tui pump-na khawl a tihchhiat avangin Aizawl khawpuiah tui a harsa chho hle a, tui sem a khaih lak avangin veng tinah mimal tui lei an tam hle.

Cyclone Remal avanga May ni 27 leh ni 28-a ruahpui vanawn surin Tlawng lui hi ti lianin Aizawl khawpui tui lakna ber PHE tui pump na chu nasa takin a tichhia a, tun thlengin tui pump ala mumal theihloh avangin Aizawl khawpuiah tui harsatna a thleng mek a, PHE hotute sawi danin tunhnaia ruahsur avanga Tlawng tui lian chu an hriat theih chinah a chim chin san ber tum an ti a, mipuite chu tui ren tur leh a tam thei ang ber ruahtui khawl turin an ngen a ni.

Tui harsatna hi Aizawl chauh nilo Aizawl chhehvel leh District dangah pawh a thleng nasa a, PHE Minister Prof Lalnilawma chuan Aizawl khawpuia pangai taka tui sem anih leh theih nan theihtawp an chhuah tih sawiin tui sem pangai theih hun erawh hriat ala nilo a ti a, hun rei zawk pawh a ngai maitheih a ti bawk.

Thudawn danin Aizawl khawpuia veng hrang hrangah mimala tui lei bakah tui in tur thianghlim lei an awm bawk a, mi tam zawkin tui thianghlim in turah PHE tui sem an rin avangin mimala tui sem atangin tui hmanchwawp tur lei mahse tui intur thianghlim hi a hran in lei thin an awm bawk a ni.

<><><>

## **GREEN LADC DAY**

Ramngaw humhalh leh Thingphun pawimawhzia inzirtirna atan a Lai Autonomous District in Green LADC Day a hman thin chu vawiin khan Chief Executive Member Pu C.Lalmuanthanga hovin hman a ni.

Green LADC Day 2024 puala inkhawm tawi, LADC Office Complex a buatsaih ah CEM Pu C.Lalmuanthanga chuan ramngaw leh nungcha humhalh a, venhim chu ram danpuuin khua leh tuitte tiktura a dah a ni a, mihring an damkhawchhuah nana tih ngei ngei a ngai tih sawiin, khawvel rawn luahzuitur te tan khawvel nuam siamturin Thingphun a enkawlzui chu tih makmawh a ni a ti.

Green LADC Day ah hian, khaw chhe hnuaiah Kaladan Multi Modal Transit Transport Project kawngpui kam ah thingtiak 327 phunin thataka hung a ni a, LADC hnuaia Department hrang hrang bakah MJA Lawngtlai District ten thing tiak hi an phun a, Green LADC hmantan kum 2015 atangin thingtiak 3,099 phunnun a enkawl mek a ni.

Green LADC Day ah hian thing chi hrang hrang phun thin a ni a, Thlado, Lenhmui, April par, Khuangthli, Herhse, Tespata, Ngiau, Char leh a dangte phun a ni tlangpui thin.

<><><>

## **ILLEGAL ARECANUT SEIZED**

Tukin khan Bilkhawthlir Kuhva Chingtu Cooperative Society Pvt Ltd aiawha duty ten Bilkhawthlir Kharzawl-ah Car pakhat Sadam Hussain Laskar, Lokhnathpur, Cachar District a cheng ni a in sawi khalh atangin Myanmar Kuhva ro bag 8 an man a, he Motor ah hian driver bakah Saidul Hussain, Lokhnathpur a chuang bawk.

Tukin vek khan Bilkhawthlir bul Chemphai kawngah Car 2 atangin Myanmar Kuhva ro an man bawk a, Shahrul, Bagha a cheng ni a in sawi khalh atangin Kuhva bag 8 leh car pakhat zawk atangin bag 4 an man bawk.

Tunhnaiah Myanmar Kuhva ro hmanga dan lova sumdawng thinte hian motor te (Car) hmangin Kuhva an phur thin tih hriat ani a, man pawh an awm nual tawh ni a hriat ani.



## **CYCLONE VICTIM MISSING**

May Ni 28-a Melthuma leimin in a hnawl zinga la hmuhloh pathumte chu a nawlpuia zawn chawlhsan ni tawh mahse Melthum YMA in a remchan dan angin an la zawng chhunzawm zel.

Tun dinhmunah Ramdinsangi, thla 4 mi, Lalvenhima Kum 8 leh Lalthakima Kum 42 te hmuh an la ni lova, Central YMA bultuma a nawlpuia zawn hna chu Ni 7 a tlin hnuah chawlhsan ni tawh mahse Melthum khawtlang chuan an la zawng chhunzawm a ni.

Aibawka leiminin a hnawl Pu Matthew Lalchhanhima, kum 34 pawh Aizawk Branch YMA Salem Section ten an la zawng chhunzawm a, Inrinni lo awm tur khian hmuh ala nihloh chuan Aizawk branch YMA pum huapin zawn hnatlang koh an tum a ni.



## **TAMDIL**

Tamdil hmuna Fisheries Deptt enkawl Sangha chi siamna hmun chu tun aia a lo him leh zual theihna turin Sub.Hqrs YMA Saitual chuan tunlai hian chhun zan zawmin an venpui.

Kan corr sawi danin, Sub.Hqrs YMA Saitual leh Fisheries Deptt te hian lui dung nungcha leh Tamdil Fish Farm humhalh kawngah MOU an lo sign tawh angin Tamdila Sangha chi siamna hmun chu kuthlei leh suahsual thila khawih a nih loh nan tunlai hian chhun zan zawmin venpui hna thawh mek a. Tun hnaia helai vela lui dung nungcha lo khawih mi 10 vel man chhuahte chu ti tawh lo turin bond sign tir an nih bakah Tui lak kawng tifai a, samfaitir an ni bawk.

Sub. Hqrs YMA hruaitute chuan Tamdil leh a vela nungcha reng reng chu humhalh tlat a nih thu leh khawih lo turin mitin an ngen a. Helai vela Sangha humhalh kawngah Fisheries Deptt chu a tul angin an thawhpui zel dawn tih an sawi.



## **MODI ELECTED AS NDA PARLIAMENTARY PARTY LEADER**

NDA Parliamentary Party hruaitu atan Narendra Modi-a, lungrual taka thlan tlin a ni. New Delhi-a NDA Parliamentary Party thutkhawm neihah Pu Modi-a hi an hruaitu atan BJP hruaitu, Union Minister ni baw, Rajnath Singh-a'n a rawt a, hei hi NDA MP dang zawng zawngin an thlawp a ni. He thutkhawmah hian Union Minister, Piyush Goyal leh Anurag Singh Thakur-a te, LJP(R), NCP, RLD President, Jan Sena, Apna Dal (S) leh JD(S) hruaitute bakah Uttar Pradesh, Gujarat, Maharashtra, Madhya Pradesh, Goa, Assam leh Manipur Chief Minister-te pawh an tel a ni.

Pu Modi-a hi Lok Sabha-a BJP leader atan leh BJP Parliamentary party leader atan thlan a ni baw a, naktip Pathianni khian Prime Minister atan lak luh a ni ang.



## **IMD FORECAST**

India Meteorological Dept (IMD) chuan ni li lo awm tur chhung hian ramchhung hmun hrang hrangah ruah, thli leh tek a thawk thei tih a sawi a, West Bengal, Sikkim leh hmar chhak bialah te pawh ruah a sur thei tih a sawi baw.

Uttar Pradesh-ah erawh chuan kar leh Thawhtanni thleng, khaw lum nasa takin a la tuam zui thei tih IMD chuan a sawi a, Madhya Pradesh, Jharkhand, Punjab, Haryana, Bihar leh Odisha-ah te pawh ni 2 ni 3 chhung chu khaw lum a la ziaawm lo thei tih sawiin hetih lai hian Delhi-ah chuan ni 2 lo awm tur chhung hian vaivut thli leh ruah a thawk thei, a ti baw.



## **INDIAN STUDENTS DROWN**

Russia-a lehkha zir, India mi 4, Volkhov lui-ah an tla hlum a, zirlai 1 dang chu chhanchhuah a ni a, damdawi inah enkawl mek a ni. External Affairs Minister sawi danin, an 5 hian Veliky Novgorod-a Yaroslav-the Wise Novgorod State University-a zirlai an ni a, an zavai hian Maharashtra-a Jalgaon Dist mi an ni.

Ruang hi hmuh kim a la ni lova, chanchin ziah lai hian ruang 2 hmuh a ni tawh a ni.

